

03- Feb.- 2026

समां - 12:25 hrs.

<><><><><><>

Railway JK Budget

केन्द्री रेलवे मंत्री अश्विनी वैष्णव होरें कल सब्भनें डिविजनें दे अधिकारियें कन्नै वीडियो कांफ्रेंसिंग राएं गल्लबात कीती ते जारी बक्ख-बक्ख परियोजनाएं ते बजट प्राथमिकताएं दी समीक्षा कीती। स्टाडे संवाददाता नै जानकारी दिती ऐ जे गल्लबात दौरान मंत्री होरें दस्सेया जे रेल बजट च जम्मू-कश्मीर लेई इक ज्हर 86 करोड़ रपे दी रकम बक्ख रखी गेदी ऐ- जेहदा इस्तमाल जम्मू-राजौरी रेल लाईन दे निर्माण ते विस्तार लेई कीता जाहगा। उनें दस्सेया जे जम्मू-राजौरी रेल लाईन दी तफसीली प्रोजैक्ट रिपोर्ट तेजिया नै तयार कीती जा रदी ऐ- जिसलै जे बारामुला-उड़ी रेल लाईन दी प्रोजैक्ट रिपोर्ट पैहले गै तयार होई चुकी दी ऐ। मंत्री होरें तफसील च चर्चा कीती जे किस चाल्ली इनें प्रोजैक्टें गी भविक्ख च तोड़ चाढ़ेया जाहगा।

<><><><><><>

Motion of Thanks

जम्मू.कश्मीर विधानसभा च अज्ज दूए रोज उपराज्यपाल हुंदे अभिभाषण पर धन्नवाद प्रस्ताव पर चर्चा होआ रदी ऐ। सरकारी नुमायंदें दे विधायक चर्चा च हिस्सा लै करदे न। अज्ज लोकहित कन्नै जुडे दे केई सारे मामलें पर चर्चा होई। इस बैहस च विधायकें गी सरकार दे नीतिगत एजेडे ते विकास योजनाएं दे सरबंध्यै च उपराज्यपाल हुंदे सम्बोधन च दस्से गेदे मुद्दें पर चर्चा करने दा मौका थ्होन्दा ऐ। कल्लै थमां शुरु होई दी बैहस मुखमन्त्री हुंदे जवाब कन्नै 5 फरवरी गी खत्म होई जाग। एहदे तैहत 6 फरवरी गी सलाना बजट पेश कीते जाने कोला पैहले विधायी कम्मकाज लेई इक रुपरेखा तयार कीती जाग। ध्यानजोग ऐ जे माली बरे 2026-27आहला बजट मुखमन्त्री उमर अब्दुल्ला हुंदे आसेया पेश कीता जाग।

<><><><><><>

CM -Tableau

मुखमन्त्री उमर अब्दुल्ला होरें गणतंत्र दिवस परेड-2026 च जम्मू-कश्मीर दी सांस्कृतिक झांकी गी दुई थाहर हासल होने पर संस्कृति मैहकमे गी ममारकबाद दिती ऐ। जम्मू-कश्मीर दी झांकी जिसी “लिविंग कैनवास” शीर्षक दिता गेदा हा- ओहदे च जम्मू-कश्मीर दी सदियें परानी कला संस्कृति- दस्तकारी ते लोक परम्पराएं दी झलक बड़ी गै आकर्षक ते शानदार ढंगै नै उजागर कीती गेदी ही। इस झांकी च जम्मू-कश्मीर दी संस्कृति दी पंछान- दस्तकारी दे प्रतीक प्रमुखता कन्नै प्रदर्शित कीते गेदे हे।

Sportsperson Approval

खेड मंत्री सतीश शर्मा होरें बेहतरीन खडारियें दी ताल आहली सूचि गी मंजूरी दिते जाने दी घोषणा कीती ऐ। सोशल मीडिया दी इक पोस्ट च उनें दस्सेया जे होनहार खडारी अपनी खेडु आहली यात्रा च हून अगो बदी सकदे ना। मंत्री सतीश शर्मा होरें मुखमंत्री उमर अब्दुल्ला हुंदा इस सूचि पर फौरी कारवाई करने ते इसी मंजूरी देने लेई धन्नवाद कीता ऐ। उनें सारे सरकारी अफसरें दी बी सिफ्त कीती- जिन्दे अनथक जत्ते करी एह उपलब्धी हासिल होई सकी। इस गैंऽ कन्नै मेद ऐ जे खेडु गतिविधियें गी बढावा थ्होग ते खडारियें दी सख्त मेहनत गी बी पंछान हासिल होग।

<><><><><><>

GOC Kishtwar Visit

फौज दी व्हाईट नाइट कोर दे जी.ओ.सी. लैफ्टिनेंट जनरल पी.के मिश्रा होरें कल किश्तवाड जिले दा दौरा लाया ते उत्थे तैनात सैनिकें गी 24 घैंटें मता सौहगा-सतर्क रौहने लेई आखेया। उन्दे कन्नै डेल्टा फोर्स दे जी.ओ.सी- ए.पी.एस. बाल बी गेदे हे। उंदा एह दौरा छात्रु दे जंगले च बर्फू कन्नै खटोए दे पहाड़ी इलाकें च छप्पे दे पाकिस्तान आधारित आतंकी संगठन जैश-ए-मोहम्मद दे आतंकवादियें गी तुप्पी कडडने लेई चलाए गेदे व्यापक अभियान दी पछोकडै च लाया गया- जित्थे उनें मजूदा हालात ते कारवाइयें लेई बंदोबस्तें दे बारे च बी जानकारी हासल कीती। इस इलाके च पिच्छले दंऊ हफ्ते दा अभियान जारी ऐ ते बिच-बिच बक्ख-बक्ख थाहरें आतंकवादियें कन्नै टाकरा ते दो तरफा गोलीबारी बी होई चुकी दी ऐ।

<><><><><><>

Bharat Darshan Tour

बन्ने आहले इलाकें च रौहने आहलें बच्चें गी भारत दी विरासत कन्नै जोडने दे जत्त तैहत बी.एस.एफ जम्मू दे आई.जी शशांक आनंद होरें कल जम्मू-राजौरी ते पुंछ दे विद्यार्थियें दे इक समूह गी “भारत दर्शन” यात्रा आस्तै झंडी दस्सियै रवाना कीता। इस दौरे च कुल 89 बच्चें शामिल न ते ओह राजस्थान- दिल्ली ते आगरा जागंन। इस पैहलकदमी दा मकसद उनेंगी भारत दी सगो-सार संस्कृति- विरासत ते इतिहास दा पैहला अनुभाव देना ऐ। अधिकारियें दस्सेया जे इस दौरे कन्नै इनें विद्यार्थियें गी अपने देश दी बक्ख-बक्ख संस्कृतियें कन्नै रूबरु होने दा मौका थ्होग ते उंदे अंदर देश भक्ति दी भावना गी बढावा थ्होग।

<><><><><><>

Weather

मौसम विभाग नै अज्ज जम्मू-कश्मीर दे केई इलाकें च हौली बरखा ते बर्फबारी दी पेशगोई कीती ऐ। कल थमां लेइयै 6 फरवरी तगर समूलचे केन्द्र शासित प्रदेश च मौसम आंशिक तौरा पर बदलोखडा बने रौहने

दी संभावना ऐ। 7 फरवरी गी किश इलाकें च हौली बरखा जां बर्फबारी होनें दे असार न- जिसलै के 8 फरवरी शा 10 फरवरी तगर आंशिक तौरा पर बहल छाए दे रौहने दी मेद ऐ।

<><><><><><>

Prog. Announcement Cancer Day

आकाशवाणी जम्मू दा क्षेत्रीय समाचार एकांश, औंदी 4 फरवरी गी दपैहरी साड्डे 12 बजे कैंसर सरबंधी अंतरराष्ट्री ध्याड़े दे उपलक्ष्य च 30एं मिंटें दे इक बशेश कार्यक्रम दा प्रसारण करग जेदा विशेसार होग- कैंसर, एहदे लक्षण, कारण ते इलाज। इस बशेश कार्यक्रम च स्थाडियां परौहिनयां होडन सरकारी मेडिकल कॉलेज जम्मू दे रेडिएशन ऑनकॉलजी विभाग दियां असिस्टेंट प्रोफेसर डॉ. संदीप कौर जेहिडियां इस विशे पर अपने माहिरा बचार सांझे करडन। इस कार्यक्रम दी मेज़बानी साढे न्यूज़ एंकर जगमोहन शर्मा आसेआ कीती जाहग।

<><><><><><>